

Durante un recepcion ameno dialuna anochi

Hospital a devela borchì cu ta recorda 30 aniversario di edificio di Hospital riba Boulevard

Lo tene e recepcion official dia 7 di maart proximo



ORANJESTAD — Durante un recepcion ameno dialuna anochi ofreci pa gerencia di Hospital Horacio Oduber Arnoud Boesten, invitadonan tabata testigo di develo di un borchì na entrada di e porta di hospital, cu ta recorda cu e anja aki hospital ta ubica na

e sitio na Punta Brabo den e edificio actual. Tabata riba e fecha aki cu defunto minister hulandes De Gaay Fortman a inaugural e edificio aki hunto cu defunto Monsignor Wim Ellis cu a bendiciona e edificio. E celebracion mes ta dia 7 di maart pero a dicidi di

celebra esaki den forma di un soft moment dialuna anochi. Mes momento a usa e oportunidad aki pa gradici directora adhunto di hospital, dr Riet vd Griendt-Odijk cu pa un periodo di mas di 8 luna a tuma mando di e hospital despues cu e director Percy Ho Kang You a dicidi cu for di maart anja pasa, ta retira di e funcion ei. Mientrastanto e hospital a logra convence dr Arnoud Boesten pa tuma mando di e hospital entrante 1 di januari 2007, cual reto e la acepta tambe. Despues di algun bishita di orientacion na 2006, Boesten a bolbe Aruba dia 5 di januari ultimo y a cuminsa cu su labor como director di hospital, dia 8 di januari ultimo.

Pa loke ta e plannan pa 2007, e vocero di hospital Bob Harms a mostra cu henter e anja aki, lo celebra esaki. Ta cuminsa dia 7 di maart cu un recepcion grandi di gala sigui pa un fiesta grandi di personal dia 12 di mei awor unda cu lo celebra esaki conhuntamente

cu esnan di hospital di Bonaire como di Corsow. Esaki ta den forma di un intercambio deportivo. Na September ta sigui un simposio riba e asina yama “Ketenzorg” na Aruba. Finalmente lo tin mas actividad tanto interno como externo di hospital. Notable ta cu a escohe pa dialuna nochì e director no hiba palabra, pero

lo bin cu un otro occasion pa haci esaki debidamente durante e recepcion di dia 7 di maart mas probable. Despues di e ceremonia di develo di e borchì, y discurso di e directora saliente, esnan invita di varios faceta di nos comunidad, a disfruta di un anochi di intercambio, cu un bon bar y snacks.